

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : TUAN HAJI AHMAD LAI BIN BUJANG
[SIBUTI]**

TARIKH : 19 NOVEMBER 2015

RUJUKAN : 8268

SOALAN:

Tuan Haji Ahmad Lai bin Bujang [Sibuti] minta **MENTERI DALAM NEGERI** menyatakan apakah perkembangan Dasar Kerajaan Malaysia untuk mencapai negara bebas dadah menjelang 2015 dapat dicapai dan berapakah jumlah perbelanjaan untuk menangani masalah dadah sejak 2008 hingga 2015. Sejauh manakah penglibatan NGO seperti Persatuan **PENGASIH** dan **PEMADAM**.

JAWAPAN:

Tuan Yang di-Pertua,

- I. Kerajaan menetapkan Visi Malaysia Bebas Dadah 2015 sejajar dengan komitmen negara-negara ASEAN yang ditetapkan dalam Mesyuarat Menteri-Menteri ASEAN ke-33 di Bangkok, Thailand pada 24 dan 25 Julai 2000 dan telah bersepakat untuk membebaskan rantau ASEAN dari ancaman dadah menjelang tahun 2015.**

Pihak ASEAN dan *United Nations Office on Drugs and Crime* (UNODC) telah berusaha menterjemahkan visi ASEAN Bebas Dadah kepada beberapa kriteria spesifik di bawah *The ASEAN Work Plan on Combatting Illicit Drug Production, Trafficking and Use* (2009 – 2015) seperti berikut :

- i. Pengurangan pembuatan haram dadah dan pengedaran dadah serta jenayah berkaitan dadah; dan**
- ii. Pengurangan permintaan dadah.**

Dasar Dadah Negara mengambilkira isu pengurangan bekalan dan pengurangan permintaan dadah yang dirangkumkan dalam Arahan No.1 Perdana Menteri 2004 yang mengandungi teras seperti berikut:

- i. **Strategi Penguatkuasaan Undang-undang;**
- ii. **Strategi Pecegahan, Pendidikan dan Publisiti;**
- iii. **Strategi Rawatan dan Pemulihan; dan**
- iv. **Strategi Kerjasama Antarabangsa.**

Untuk makluman Yang Berhormat, menyedari keadaan masalah dadah yang masih serius, *Commission on Narcotic Drugs*, pada Persidangan Ke-52 yang telah diadakan pada 11 dan 12 Mac 2009 di Vienna, telah menyarankan agar usaha-usaha untuk menangani masalah dadah diteruskan sehingga ke tahun 2019. Pada *United Nation General Assembly* di New York yang akan diadakan pada 2016 berkaitan dadah, semua negara akan merangka strategi baru menangani masalah dadah untuk tempoh 2016 – 2025. Sehubungan itu Malaysia sedang mengkaji semula dasar dadah yang sedia ada.

- ii. **Anggaran perbelanjaan Agensi Antidadah Kebangsaan (AADK) untuk menangani masalah penyalahgunaan dadah sejak 2008 sehingga Ogos,2015 adalah sebanyak RM 2,446,471,280.97.**
- iii. **Kerajaan sentiasa menghargai dan mengiktiraf peranan dan sumbangan pertubuhan NGO dalam usaha membina dan membangunkan negara. Pihak Kerajaan sedar permasalahan dadah tidak dapat diatasi tanpa penglibatan NGO.**

Pertubuhan NGO pencegahan dan pemulihan penyalahgunaan dadah memahami keperluan untuk melengkapi dan menambah (*complement and supplement*) kepada usaha Kerajaan membasmi dadah dan seterusnya menggerakkan usaha mereka itu secara individu atau kolektif di dalam masyarakat, peringkat nasional dan antarabangsa untuk mencegah, merawat dan memulihkan penagih dadah.

Pertubuhan NGO yang bergerak aktif seperti PEMADAM, PENGASIH, PENDAMAI, KOMITED MALAYSIA, DFYA, Yayasan SALAM, PRSM dan lain-lainnya mengadakan kerjasama dengan AADK dalam menjalankan program-program pencegahan, rawatan dan pemulihan dadah di peringkat akar umbi dalam komuniti dan fasiliti pemulihan milik Agensi Antidadah Kebangsaan (AADK) dan Pusat Pemulihan Dadah Persendirian (PPDP) mereka sendiri.

Sepanjang tahun 2014 hingga Jun, 2015, sebanyak 112 program telah dilaksanakan oleh pertubuhan NGO terbabit dengan melibatkan lebih kurang 10,230 peserta dalam kalangan penagih dadah, ahli keluarga dan masyarakat setempat menggunakan pembiayaan Geran Yayasan Albukhary. NGO juga ada menerima sumbangan kewangan dari pihak swasta dan *Government Listed Company (GLC)* seperti PENGASIH dan PEMADAM untuk menjalankan program-program pencegahan dadah.